

明史卷十

本紀第十

敕修

英宗前紀

英宗法天立道仁明誠敬昭文憲武至德廣孝睿皇帝
諱祁鎮宣宗長子也母貴妃孫氏生四月立爲皇太子
遂冊貴妃爲皇后宣德十年春正月宣宗崩壬午卽皇
帝位遵遺詔大事白皇太后行大赦天下以明年爲正
統元年始罷午朝丁亥尚書蹇義卒辛丑戶部尚書黃
福叅贊南京守備機務二月戊申尊皇太后爲太皇太

總裁官總理事務 經筵講官少保兼太子太保保和殿大學兼管吏部戶部尚書事加六級張廷玉等奉

后庚戌尊皇后爲皇太后辛亥封弟祁鉉爲鄜王甲寅
罷諸司冗費三月戊寅放教坊司樂工三千八百餘人
辛巳罷山陵夫役萬七千人丙申諭三法司死罪臨決
三覆奏然後加刑夏四月壬戌以元學士吳澄從祀孔
子廟庭丁卯以久旱考察布按二司及府州縣官戊辰
遣給事中御史捕畿南山東河南淮安蝗五月壬午戶
部言浙江蘇松荒田稅糧減除二百七十七萬餘石請
加覆覈帝以覈實必增額爲民患不許六月丁未令天
下瘞暴骸辛酉葬章皇帝於景陵秋七月丙子免山西
夏稅之半八月丙午減光祿寺膳夫四千七百餘人九

月壬辰詔督漕總兵及諸巡撫官歲以八月至京會廷
臣議事是月王振掌司禮監冬十月壬寅遣使諭阿台
朶兒只伯辛亥詔天下衛所皆立學十一月戊辰朔日
有食之十二月壬子阿台朶兒只伯犯涼州鎮番總兵
官陳懋敗之於黑山是年琉球中山暹羅日本占城安
南滿刺加哈密瓦刺入貢

正統元年春正月丙戌罷銅仁金場庚寅發禁軍三萬
人屯田畿輔三月己巳賜周旋等進士及第出身有差
乙亥御經筵夏四月丁酉朔享太廟五月丁卯阿台朶
兒只伯寇肅州壬辰設提督學校官秋八月甲戌右都

督蔣貴充總兵官都督同知趙安副之帥師討阿台朵
兒只伯九月癸卯遣侍郎何文淵王佐副都御史朱與
言督兩淮長蘆浙江鹽課欽差巡鹽自此始庚申封黎
利子麟爲安南國王冬十一月乙卯詔京官三品以上
舉堪任御史者四品及侍從言官舉堪任知縣者各一
人免湖廣被災稅糧十二月丁丑以邊議稽緩下兵部
尚書王驥侍郎鄺埜於獄尋釋之乙酉湖廣貴州總兵
官蕭授討廣西蒙顧十六洞賊平之是年琉球中山瓜
哇安南烏斯藏占城瓦刺入貢遣宣德時來貢古里蘇
門答刺十一國使臣還國

二年春正月甲午宣宗神主祔太廟己亥太同總兵官
方政都指揮楊洪會寧夏甘肅兵出塞討阿台朵兒只
伯三月甲午錄囚戊午御史金敬撫輯大名及河南陝
西逃民夏四月免河南被災田糧五月庚寅兵部尚書
王驥經理甘肅邊務壬寅刑部尚書魏源經理大同邊
務丁未免陝西平涼六府旱災夏稅六月乙亥以宋胡
安國蔡沈眞德秀從祀孔子廟庭庚辰副都御史賈諒
侍郎鄭辰振河南江北饑冬十月甲子鎮守甘肅左副
總兵任禮充總兵官都督蔣貴都督同知趙安爲左右
副總兵兵部侍郎柴車僉都御史曹翼羅亨信參贊軍

務討阿台朵兒只伯兵部尚書王驥太監王貴監督之
十一月乙巳振河南饑免稅糧是年琉球中山撒馬兒
罕暹羅土魯番瓦刺哈密入貢

三年春三月己亥京師地震辛丑振陝西饑夏四月乙
卯王驥任禮蔣貴趙安襲擊阿台朵兒只伯大破之追
至黑泉還癸未立大同馬市六月癸酉以旱讞中外疑
獄乙亥都督方政僉事張榮同征南將軍黔國公沐晟
右都督沐昂討麓川叛蠻思任發秋七月癸未下禮部
尚書胡淡於獄辛卯下戶部尚書劉中敷於獄尋俱釋
之八月乙亥以陝西饑令雜犯死囚以下輸銀贖罪送

邊吏易米九月癸巳蠲兩畿湖廣逋賦冬十月癸丑再振陝西饑十二月丙辰下刑部尚書魏源右都御史陳智等於獄是年榜葛刺貢麒麟中外表賀琉球中山暹羅占城瓦刺入貢

四年春正月壬午方政破麓川蠻於大寨追至空泥敗沒二月丁巳總兵官蕭授平貴州計砂叛苗閏月辛丑釋魏源陳智等復其官并宥棄交趾王通馬騏罪三月己酉詔赦天下壬子賜施槃等進士及第出身有差庚申廢遼王貴熾爲庶人丁卯黔國公沐晟卒於軍癸酉增南京及在外文武官軍俸廩夏五月庚戌右都督沐

昂爲征南將軍充總兵官討思任發丁卯錄中外囚六
月乙未京師地震丁酉以京畿水災祭告天地諭羣臣
修省戊戌下詔寬卹求直言秋七月庚戌免兩畿山東
江西河南被災稅糧壬申汰冗官八月戊戌增設沿海
備倭官己亥京師地震冬十二月丁丑都督同知李安
充總兵官僉都御史王翲叅贊軍務討松潘祈命簇叛
番是年琉球占城安南瓦刺榜葛刺滿刺加哈密入貢
五年春正月己未大祀天地於南郊二月乙亥侍講學
士馬愉侍講曹鼐入閣預機務甲申僉都御史張純大
理少卿李畛振撫畿內流民三月戊申建北京宮殿夏

四月壬申免山西逋賦丙戌祈命簇番降五月征麓川
叅將張榮敗績於芒市六月丁丑免兩畿被災田糧戊
寅錄囚秋七月辛丑遣刑部侍郎何文淵等分行天下
修備荒之政壬寅楊榮卒八月乙未令各邊修舉荒政
九月壬寅蠲雲南逋賦冬十一月壬寅振浙江饑壬子
免蘇松常鎮嘉湖水災稅糧丁巳廣西僧楊行祥僞稱
建文帝械送京師錮錦衣衛獄死乙丑沐昂討平師宗
叛蠻十二月壬午免南畿浙江山東河南被災稅糧是
年占城琉球中山哈密烏斯藏入貢

六年春正月己亥朔日當食不見禮官請表賀不許庚

戊大祀天地於南郊乙卯以莊浪地屢震躬祀郊廟遣使祭西方嶽鎮大舉征麓川定西伯蔣貴爲平蠻將軍都督同知李安僉事劉聚副之兵部尚書王驥總督軍務三月庚子下兵部侍郎于謙於獄夏四月甲午以災異遣使省天下疑獄五月甲寅刑部侍郎何文淵大理卿王文錄在京刑獄巡撫侍郎周忱刑科給事中郭瑾錄南京刑獄釋于謙爲大理少卿秋七月丁未振浙江湖廣饑冬十月丁丑戶部尚書劉中敷侍郎吳璽陳瑞荷校於長安門旬餘釋還職庚寅免畿內被災稅糧十一月甲午朔乾清坤寧二宮奉天華蓋謹身三殿成大

赦定都北京文武諸司不稱行在癸卯王驥拔麓川上江寨癸丑免河南山東及鳳陽等府被災稅糧閏月甲戌復下劉中敷吳璽陳瑋於獄踰年釋中敷爲民璽瑋戍邊十二月王驥克麓川思任發走孟養丁未班師左副總兵李安攻餘賊於高黎貢山敗績是年占城瓦刺哈密入貢

七年春正月甲戌大祀天地於南郊二月庚申如天壽山三月甲子還宮乙亥免陝西屯糧十之五戊寅賜劉儼等進士及第出身有差夏四月甲午振陝西饑是月免山西河南山東被災稅糧五月壬申論平麓川功進

封蔣貴爲侯王驥靖遠伯戊寅立皇后錢氏丁亥倭陷
大嵩所六月壬子戶部侍郎焦宏備倭浙江秋七月丙
寅振陝西饑民贖民所鬻子女八月壬寅復命王驥總
督雲南軍務九月甲戌陝西進嘉禾禮臣請表賀不許
冬十月壬辰兀良哈犯廣寧乙巳太皇太后崩十二月
葬誠孝昭皇后於獻陵是年占城瓦刺哈密琉球中山
安南瓜哇土魯番烏斯藏入貢

八年春正月丁卯大祀天地於南郊二月己丑汰南京
冗官戊戌淮王瞻堦來朝丙午荆王瞻堦來朝夏五月
己巳復命平蠻將軍蔣貴王驥帥師征麓川思任發子

思機發戊寅雷震奉天殿鴟吻敕修省壬午大赦六月
丁亥侍講劉球陳十事下錦衣衛獄太監王振使指揮
馬順殺之甲辰下大理少卿薛瑄於獄秋七月戊午祭
酒李時勉荷校於國子監門三日九月甲子思機發請
降冬十一月宣宗廢后胡氏卒十二月癸未免山東復
業民稅糧二年丙戌駙馬都尉焦敬荷校於長安右門
是年占城安南瓦刺哈密瓜哇入貢

九年春正月甲寅右都御史王文巡延安寧夏邊辛酉
大祀天地於南郊辛未成國公朱勇興安伯徐亨都督
馬亮陳懷同太監僧保曹吉祥劉永誠但住分道討兀

良哈二月丙午王驥擊走思機發俘其孥以獻召驥還
三月辛亥朔新建太學成釋奠於先師孔子甲子朱勇
等師還楊士奇卒乙丑敘征兀良哈功封陳懷平鄉伯
馬亮招遠伯成國公朱勇等進秩有差夏四月丙戌翰
林學士陳循直文淵閣預機務丁亥振沙州及赤斤蒙
古饑五月己未命法司錄在京刑獄刑部侍郎馬昂錄
南京刑獄六月壬午振湖廣貴州蠻饑秋七月己酉下
駙馬都尉石璟於獄處州賊葉宗留盜福安銀礦殺福
建叅議竺淵癸丑免河南被災稅糧閏月戊寅復開福
建浙江銀場甲申瘞暴骸壬寅雷震奉先殿鴟吻八月

庚戌免陝西被災稅糧贖民所鬻子女甲戌敕邊將備
瓦刺也先九月丁亥靖遠伯王驥右都御史陳鑑經理
西北邊備冬十月丙午朔日有食之庚午兀良哈貢馬
謝罪是年兩畿山東河南浙江湖廣大水江河皆溢暹
羅琉球中山瓦刺安南烏斯藏滿刺加入貢

十年春正月丙戌大祀天地於南郊戊子詔舉智勇之
士二月丁巳京師地震己未免陝西逋賦丙寅兀良哈
貢馬請貸犯邊者罪不許壬申如天壽山三月丙子還
宮庚辰思機發入貢謝罪庚寅賜商輅等進士及第出
身有差夏四月甲辰朔日有食之庚申詔所在有司飼

逃民復業及流移就食者六月乙丑振陝西饑免田租
三之二秋七月乙未減糶河南懷慶倉粟濟山陝饑八
月癸丑免湖廣旱災秋糧丙辰免蘇松嘉湖十四府州
水災秋糧冬十月戊辰侍讀學士苗衷爲兵部侍郎侍
講學士高穀爲工部侍郎並入閣預機務十二月丙辰
緬甸獲思任發斬其首送京師壬辰輸河南粟振陝西
饑廣西總兵官安遠侯柳溥討平慶遠叛蠻是年琉球
中山哈密亦力把里安南占城滿刺加錫蘭山撒馬兒
罕烏斯藏入貢

十一年春正月己卯大祀天地於南郊庚辰予太監王

振等弟姪世襲錦衣衛官二月辛酉異氣見華蓋奉天
殿遣官祭告天地癸亥詔卹刑獄三月戊辰下戶部尚
書王佐刑部尚書金濂右都御史陳鑑等於錦衣衛獄
尋釋之壬申御史柳華督福建浙江江西兵討礦賊癸
酉如天壽山庚辰還宮夏六月丙辰京師地震秋七月
癸酉增市廛稅鈔庚辰楊溥卒八月戊戌免湖廣被災
秋糧庚申下吏部尚書王直等於獄尋釋之九月辛巳
廣西猺叛執化州知州茅自得殺千戶汪義冬十月甲
寅遣給事中御史分賚諸邊軍士十一月壬申減殊死
以下罪是年琉球中山暹羅安南瓜哇回回哈密占城